




**Ն. Ս. Օ. Տ. Տ. ԳԱՐԵԳԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ ԽՈՍՔԸ
ՀԱՆԽԱԳԱՀԻ ԵՐԱՄՆԱԿԱՆՈՒԹՅԱՆ ԱՐԱՐՈՂՈՒԹՅԱՆ ԱՌԻԹՈՎ**

(Երեւան, 13 մարտի, 2022 թ.)

*Մեծարգո՛ նախագահ Հայաստանի Հանրապետության,
մեծարգո՛ նախագահ Արցախի Հանրապետության,
մեծարգո՛ վարչապետ,
մեծարգո՛ նախագահ Ազգային ժողովի եւ հարգելի՛ ներկաներ,*

*Այսօր մասնակից ենք հայրենական կյանքի կարեւոր իրադարձու-
թյան՝ Հայաստանի Հանրապետության նորընտիր նախագահի երդմնա-
կալության արարողությանը, որի առիթով Հայրապետական Մեր օրհնու-
թյունն ու բարեմաղթանքներն ենք բերում Ձեզ, պարոն՝ նախագահ, եւ
մեր ողջ ժողովրդին:*

*Երեսուն տարի առաջ մեր ժողովուրդը հերոսական պայքարով վե-
րակերտեց իր անկախ պետականությունը՝ անցնելով մաքառումնե-
րի եւ փորձությունների դժվարին ուղիով: Այդ տարիների ընթացքում
մեր պետականության կայացման ճանապարհին երկրի առաջնոր-
դությունը հանձն առան չորս նախագահներ: Այսօր Դուք եք ստանձ-
նում այդ պատասխանատու պաշտոնը, որ խորհրդանշի է հայոց
անկախ պետականության:*

*Ձեր պաշտոնակալությունը տեղի է ունենում դժվարին ժամանակա-
հատվածում, երբ հայրենիքը վիրավոր է արցախյան պատերազմի աղե-
տալի կորուստներով, եւ հաղթահարված չեն պատերազմի առաջ բերած
մարտահրավերները, երբ տակավին գերության մեջ են եւ անհայտ կո-
րած մեր զավակները, եւ պարբերաբար շարունակվում են ոտնձգություն-
ները հայրենյաց սահմանների նկատմամբ, երբ ներազգային կյանքում
տիրող անհանդուրժողականության մթնոլորտը եւ ներհասարակական
բեկեռացվածությունը շարունակում են խռովել մեր ժողովրդի հոգին:*

Ամենքս այսօր մտահոգ ենք մեր երկրի իրավիճակով, երերուն է խաղաղությունը Հայաստանում ու Արցախում, ծառացած են արցախահայության իրավունքների պաշտպանության եւ հակամարտության խաղաղ ու արդար կարգավորման հարցերը, եւ ապագան անորոշություններ է պարունակում:

Մտահոգ ենք եւ աշխարհը փոթորկող տագնապներով ու հակամարտություններով, աշխարհաքաղաքական եւ տարածաշրջանային բարդ զարգացումներով: Ներկայիս ծանրագույն մարտահրավերների պայմաններում հրամայական են ներհասարակական հաշտության օրակարգի իրականացումը, ազգային միասնականության վերականգնումը, հայրենիքի ապագայի եւ ազգային նպատակների շուրջ համընդհանուր տեսլականի ձեւավորումը, որով կարելի կլինի հաղթահարել առկա խնդիրները, զորացնել մեր պետականությունը, հետամուտ լինել անվտանգային հարցերի լուծմանը, համախմբել համազգային ողջ ներուժը՝ ի շահ հայրենիքի եւ ժողովրդի:

Ցավով ենք անդրադառնում, որ երկփեղկված է մեր ժողովուրդը ոչ միայն Հայաստանում, այլեւ Սփյուռքում՝ պայմանավորված հայրենիքում տեղ գտնող մտահոգիչ զարգացումներով, ինքնության ճգնաժամով եւ ներքին խնդիրներով: Սփյուռքի համայնքների ու ավանդական կազմակերպությունների զորացումը նույնպես պետք է լինի հայրենի պետության առաջնահերթությունը:

Որպես պետության գլխի՝ Հանրապետության նախագահի իրավասության տիրույթում է հետամուտ լինելը երկրում արդարության ու օրինականության գերակայությանը, համապետական եւ համազգային շահերի պաշտպանությանը, որով, պարոն նախագահ, պիտի նպաստեք մեր ժողովրդի ու հայրենիքի վերքերի ամոքմանը, պետության առաջընթացին եւ ապահով գալիքի կերտմանը: Մաղթում ենք, որ Աստծու եւ ժողովրդի առջեւ կատարած Ձեր երդումը մշտապես ուժի եւ զորության, անմնացորդ նվիրումի աղբյուր լինի՝ արդյունավորելու պատասխանատու եւ դժվարին Ձեր առաքելությունը:

Հայոց Եկեղեցին, ինչպես բոլոր ժամանակներում իր կոչմանը եւ ծառայությանը հավատարիմ, այսօր եւս շարունակելու է հայրենի պետության հետ գործակցությունը Սահմանադրության ոգուն համահունչ՝ հանուն մեր անկախ պետականության եւ մեր ժողովրդի խաղաղ ու բարօր, համերաշխ ու միաբան կյանքի՝ միշտ ուսուցանելով առաքյալի հորդորը.

«Նույն բանը խորհեցե՛ք, նույն սերն ունեցե՛ք ձեր մեջ, եղե՛ք միաշունչ, միախորհուրդ» (Փիլիպ. Բ. 2):

Պատմության հոլովույթներում ազգային մեր միաբանությունը եւ հայրենաշեն ձեռքբերումները խարսխվել են ամենատարբեր փորձությունների դիմակայած մեր նվիրական արժեքների վրա: Մեր ազգային արժեհամակարգը այսօր էլ պետք է սրբությամբ պահպանվի իբրեւ գրավական մեր ինքնության եւ գոյության եւ դիտարկվի ամուր հիմը մեր ժողովրդի զավակների կրթության ու դաստիարակության:

Զափազանց մեծ է այն գինը, որը մենք վճարել ենք անկախ պետականության վերակերտման ճանապարհին: Հայրապետական Մեր հորդորն ենք ուղղում համայն մեր ժողովրդին՝ ապրենք եւ առաջնորդվենք գիտակցությամբ, որ հայրենիքն Աստծու պարգեւն է մեր ազգին, եւ յուրաքանչյուրս կոչված ենք ամեն հանձնառություն ստանձնելու, ջանք եւ եռանդ չխնայելու՝ հանուն մեր երկրի հզորության եւ պայծառության: Հավատով նորոգվենք եւ մեր կյանքը շաղախենք հայրենյաց անսակարկ սիրով եւ բարեպաշտ ընթացքով: Ինչպես սաղմոսերգուն է ասում, մեր աստվածահաճո արարումներով «մեծարենք Տիրոջը, բարձրացնենք Նրա անունը միասին» (Սաղմ. ԼԳ. 4) եւ հույսով ու լավատեսությամբ զորացած՝ համատեղ գործենք հանուն մեր լուսավոր գալիքի:

Աղոթում ենք առ Բարձրյալն Աստված, որ անվտանգ ու արժանապատիվ կյանքի նոր հորիզոններ բացի մեր ժողովրդի առջեւ՝ խաղաղության մեջ պահելով աշխարհը համայն, Հայաստան ու Արցախ մեր հայրենիքը եւ համբերատարության ու տոկունության մեջ զորացնելով հավատավոր մեր բոլոր զավակներին:

Թող Երկնավոր Տիրոջ շնորհը, սերն ու ողորմությունը լինեն ամենքիս եւ ողջ մարդկության հետ, այսօր եւ հավիտյանս. ամեն:

